



საჯარო სამართლის იურიდიული პირი
ილიას სახელმწიფო უნივერსიტეტი



ბრძანება

ქ. თბილისი

N 1428-03

12/09/2024

რექტორის 2018 წლის 12 მარტის N983-03 ბრძანებაში „ილიას სახელმწიფო უნივერსიტეტის გაცვლით საგანმანათლებლო პროგრამაში მონაწილე სტუდენტებისთვის გაცვლითი საგანმანათლებლო პროგრამის ადმინისტრირების წესისა და პროცედურების დამტკიცების შესახებ“ ცვლილებისა და დამატების შეტანის თაობაზე

ზოგადი ადმინისტრაციული კოდექსის 63-ე მუხლის, უმაღლესი განათლების შესახებ საქართველოს კანონის 22-ე მუხლის 1-ლი პუნქტის, საქართველოს განათლების და მეცნიერების მინისტრის 2013 წლის 11 სექტემბრის N134/ნ ბრძანებით დამტკიცებული „საჯარო სამართლის იურიდიული პირის ილიას სახელმწიფო უნივერსიტეტის წესდების“ მე-18 მუხლის პირველი და მეექვსე პუნქტის საფუძველზე და საერთაშორისო ურთიერთობების სამსახურის უფროსის 2024 წლის 10 სექტემბრის N15598-35 სამსახურებრივი ბარათის გათვალისწინებით

ვბრძანებ

1. შევიდეს ცვლილება რექტორის 2018 წლის 12 მარტის N983-03 ბრძანების პირველი პუნქტით დამტკიცებულ „ილიას სახელმწიფო უნივერსიტეტის სტუდენტთათვის გაცვლითი საგანმანათლებლო პროგრამის ადმინისტრირების წესსა და პროცედურებში“, კერძოდ:

ა) მეორე მუხლის 2.1 პუნქტის „ბ“ ქვეპუნქტს „ბ“ ქვეპუნქტის შემდეგ დაემატოს „ბ“ ქვეპუნქტი ჩამოყალიბდეს შემდეგნაირად:

„ბ“) საბაკალავრო და სამაგისტრო საფეხურის სტუდენტი ვალდებულია სააპლიკაციო ფორმაში წარმოადგინოს კურიკულუმის ექსპერტთან შეთანხმებული და ფაკულტეტის დეკანის მიერ ხელმოწერილი სასწავლო ხელშეკრულება მინიმუმ 12 კრედიტის მოცულობის საგნების მითითებით, რომლებიც აღიარებადია სტუდენტის მშობლიური კურიკულუმის ფარგლებში. თუ მასპინძელ უნივერსიტეტს დაწესებული აქვს კრედიტების განსხვავებული მინიმალური რაოდენობა, მათი მოთხოვნა იქნება უპირატესი. აღნიშნულის გათვალისწინება სავალდებულოა როგორც კონკურსის მიმდინარეობისას, ისე შერჩეული კანდიდატების მიერ მობილობის დაწყებამდე. მოთხოვნის შეუსრულებლობა კონკურსის მიმდინარეობისას გამოიწვევს განაცხადის დახარვეზებას. ხოლო მობილობის დაწყებამდე სასწავლო ხელშეკრულების იმგვარი ცვლილება, რომელიც შესაბამისობაში არ იქნება ზემოაღნიშნულ მოთხოვნასთან, შესაძლოა გახდეს მობილობის გაუქმების მიზეზი.“

ბ) შევიდეს ცვლილება მეორე მუხლის 2.6 პუნქტის მე-3 ქვეპუნქტის „ა“ პუნქტში და ჩამოყალიბდეს შემდეგნაირად:

„ა) იმ შემთხვევაში, თუ აპლიკანტებს აქვთ იდენტური საბოლოო შეფასება, უპირატესობა მიენიჭება მესამე მუხლის მეოთხე პუნქტით გათვალისწინებული ერთ-ერთი კრიტერიუმის დამადასტურებელი ცნობის მქონე სტუდენტს;

გ) შევიდეს ცვლილება მე-3 მუხლის:

გ.ა) მე-4 პუნქტში და ჩამოყალიბდეს შემდეგნაირად:

„4. სოციალურად მოწყვლადი და სხვა განსაკუთრებული კატეგორიის (ეგრეთ წოდებული fewer opportunities) სტუდენტებისთვის შესაძლოა ხელმისაწვდომი იყოს დანამატი ყოველთვიურ სტიპენდიაზე თუკი აღნიშნული გათვალისწინებულია მასპინძელ უნივერსიტეტში მიმდინარე Erasmus + პროექტის ფარგლებში. ამის შესახებ ინფორმაციას მიიღებენ საბოლოოდ შერჩეული სტუდენტები უშუალოდ მასპინძელი უნივერსიტეტის მხრიდან, რომელიც განსაზღვრავს ნაკლები შესაძლებლობების მქონე ჯგუფის კრიტერიუმებს. სხვა შემთხვევებში, როდესაც მასპინძელ უნივერსიტეტს არ აქვს საკუთარი მოთხოვნები, დანამატის მისაღებად სტუდენტის წარდგენა ილიას სახელმწიფო უნივერსიტეტის მხრიდან შესაძლებელია შემდეგი კრიტერიუმების საფუძველზე (სტუდენტმა დამადასტურებელი დოკუმენტაცია უნდა წარმოადგინოს აპლიკაციის ფორმაში):

- მარტოხელა დედის/მარტოხელა მამის სტატუსი;
- მრავალშვილიანი ოჯახის წევრის სტატუსი;
- იძულებით გადაადგილებული პირის სტატუსი;
- შეზღუდული შესაძლებლობების მქონე პირის სტატუსი;
- სოციალურად დაუცველი პირის სტატუსი;
- მაღალმთიან დასახლებაში მუდმივად მცხოვრები პირის სტატუსი;
- საზღვრისპირა ტერიტორიაზე მცხოვრები პირის სტატუსი;
- ტერიტორიული მთლიანობის დაცვისთვის დაღუპულ პირთა ოჯახის წევრის სტატუსი.“

გ.ბ) მე-5 პუნქტის 1-ლ ქვეპუნქტში და ჩამოყალიბდეს შემდეგნაირად:

„1. კონკურსის შედეგად შერჩეული სტუდენტი ვალდებულია მშობლიურ და მასპინძელ უნივერსიტეტებთან შეათანხმოს და მოამზადოს სამმხრივად ხელმოწერილი (მშობლიური უნივერსიტეტი, მასპინძელი უნივერსიტეტი, სტუდენტი) სასწავლო ხელშეკრულება მასპინძელ უნივერსიტეტში გამგზავრებამდე.“

2. საერთაშორისო ურთიერთობების სამსახურს დაევალოს ამ ბრძანებით დამტკიცებული ცვლილების გათვალისწინებით, წესის კონსოლიდირებული ვერსიის (ამ ბრძანების დანართი) უნივერსიტეტის ვებგვერდზე განთავსების ორგანიზება.

3. საინფორმაციო ტექნოლოგიების სამსახურს დაევალოს აღნიშნული ცვლილებისა და მის საფუძველზე კოდიფიცირებული წესის პროგრამა „არგუსის“ მეშვეობით უნივერსიტეტის სტუდენტებისათვის გაცნობა.

4. უნივერსიტეტის კანცელარიას დაევალოს უზრუნველყოს ამ წესის ატვირთვა შიდა საუნივერსიტეტო პროგრამა „კოდექსში“ და გააცნოს ეს ბრძანება უნივერსიტეტის ყველა ფაკულტეტს/სკოლას, რექტორის აპარატს, ადმინისტრაციის ხელმძღვანელს, ადმინისტრაციის სამდივნოს, საზოგადოებასთან ურთიერთობის სამსახურს, სტუდენტურ საქმეთა დეპარტამენტს, ხარისხის უზრუნველყოფის სამსახურს, იურიდიულ სამსახურს, საერთაშორისო ურთიერთობების სამსახურს, საინფორმაციო ტექნოლოგიების სამსახურს.

ნინო დობორჯგინიძე

რექტორი

